









DISCOVRS

AV PEUPLE DE PARIS,
ET AUTRES CATHOLI-
ques de France, sur les nouvelles
entreprises des rebelles, &
seditieux.



A PARIS,
Chez Michel de Roigny, Libraire de-
meurant rue S. Iacques aux quatre
Elemens.

AVEC PRIVILEGE.

1585.

Case

F

39

326

1585d

THE NEWBERRY
LIBRARY



DISCOVRS AV

PEUPLE DE PARIS, ET
autres Catholiques de France, sur les
entreprises des rebelles, & seditieux.



D V I S qu'en la com-
mune afflictio de tout
le corps François, tu as
esté choisy (Peuple pa-
risien) pour servir de
subiect à la rage des
côspirateurs, & que de
tout temps, au moins

dés que des reuoltes ont esproüue la pati-
ence du Roy nostre souuerain Prince, on
n'a tasché qu'à te surprétre: Puisque cha-
cun aussi en la pourchasse et poursuyte des
ennemys de Dieu, du Roy, et de ceste Roy-
alle et premiere cité du Royaume, chascū
se meēt en quelque deuoir, soit par con-
seil, pour obuier aux complots des traï-
tres, soit par armes, pour leur faire resi-
stéce, soit par prieres pour appaiser l'ire de
Dieu, qui permet ces troubles, & pour
esproüuer nostre patiéce, & pour chastie-
ment de noz faultes, pour destourner ce-

A ij

ste tempeste, & dangereux orage. Il me
semble que ie serois à blasmer, si estât oysif
& comme prenant plaisir en la calamité,
ie ne me mettois en quelque deuoir, selon
que ie sçay, & qu'il est en ma puissance,
esguillonner par l'exemple de vous tous
fidelle subiects du Roy, et vray Catholi-
ques, de seruir de quelque chose à la Re-
publique tât affligée & vexée par l'incur-
sion de ceux lesquels de fresche memoire
ont conspiré & se sont reuoltez & rebel-
lez contre Dieu, leur Prince, & contre
l'Eglise, desquels comme la cause est la
plus iuste du monde (veu la tant grande
debonnairté du Roy en leur endroit)
aussy fault-il esperer moyennant la grace
de Dieu, que leur folle entreprise, cruaute,
& inhumanité, qui outrepassent l'insolce
& la bestialité de toutes nations barbares
& infidelles, sera bien tost reprimée par
vn iuste iugement de la iustice diuine, &
humaine. De cecy la cite de Paris a grand
matiere & argument de remercier Dieu
sur toutes les autres de ce Royaume, tel-
lemēt preseruee par la bôte diuine, qu'elle
aye veu les impudens visages, & ouy les
paroles execrables des predicans, & mi-
nistres du diable, blasphemans le saint
sacrifice de Iesus Christ, & tous les autres
Sacremēs, n'y aye experimenté (au moins

bien peu) ce que c'est d'auoir les ennemis
de Dieu & de l'Eglise dedans ses entrailles
c'est à dire dedâs la ceinture de ses murail-
les . Si est-ce que maintenant ell'a le des-
sus, ayant veu ruyner le chef des hereti-
ques , & descourir les factions des con-
spirateurs cõtre le salut du Roy , & de ses
subiects plus fidelles. Quelques vns pos-
sible par ie ne sçay quelle inaduisee enuie
de choses nouuelles, & induits par la le-
cture de quelques meschants petits liu-
res, se fians par trop à leurs esprits , sans
demander l'aduis des gens doctes, des-
quelz il y a icy si grand nombre, ont quel-
que peu varié : Mais maintenant qu'ils
voyent clèrement, que leur erreur prece-
doit d'une deception diabolique: d'un bon
cœur, & de bonne affection se rangent à
l'vniuersel consentement de l'Eglise.

Quand doncques à l'vniõ & concorde
de toute la cité en vne mesme foy, & re-
ligion, ie iuge à mon aduis qu'elle est tel-
le que le defaut d'icelle (Dieu aydant) ne
nous portera aucun dommage . Et posé
ores qu'il y en eust quelques vn desquelz
ou peust auoir quelque doubte qui ne sont
rien au regard de la reste : Il est à presu-
poser que la prudẽce du Roy, de la Iusti-
ce, & des autres Officiers, & Magistratz
d'icelle cité est telle, qu'ayant diligem-

l'œil sur eux, ilz donneront si bon ordre, que le commun consentement de la cité, ne recevra aucun detrimement, par la malignité de peu de gens. Quant à ceux-là donques (si aucuns y en a) ie voy point qu'en y pouruoyant ainsi qu'il faut, il y ayt cause d'auoir, aucun doubte. Cецy craindrois-je bien plus, qu'il y en eust plusieurs, qui n'eussent pas le cœur si genereux, & si magnanime qu'ils deuroient (comme ie ne doubte qu'il n'y en aye beaucoup en plusieurs villes de ce Royaume) non pas que d'eux-mesmes ilz soient lasches ou pusillannimes mais tant pour ce qu'ilz n'ont pas l'opinion qu'ilz debueroient auoir de l'exécrable meschanceté & impieté de noz ennemis: que pource qu'ilz estiment que cецy ne leur touche en rien, & qu'ilz n'y ont point d'interest: Ce qui les pourroit faire tellement perdre courage, que tout ce qu'ilz feroient, ne seroit qu'à la contraincte, & à regret. Il y a quelques temps qu'ay mis en lumiere vn petit traicté, auquel ie monstre les ruses & finesses du diable, desquelles il vse pour abolir le Sainct Sacrifice de Iesus Christ, par lequel on verra clerement qui est la cause depuis cinquante ans en ça les Heretiques ont fait tout leur effort pour abolir la Messe, en laquelle est offert à

Dieu pour les pechez , le précieux corps,
 & sang de Iesus Christ , selon son institu-
 tion, & ce par assemblees , & conuenticu-
 les illicites , ou par quelquez petits liures
 pestilens , & plains de poison qu'ilz se-
 moient par le peuple . Mais depuis vn peu
 ilz ont tellemēt ose leuer les cornes, qu'ilz
 osent bien publiquemēt mettre en auant
 Combien que Iesus Christ ayt dit , que
 contte l'Eglise edifiee sur la pierre , qui est
 la foy de Sainct Pierre , toutes les portes
 infernales , c'est à dire tous les assauts des
 diables , & des Heretiques, ne pourront
 auoir le dessus. Ils sont dis-ie tant effron-
 tez, & outrecuidez, qu'ilz disent l'abolir
 du tout . Et pōurtant qu'ilz ont veu ne
 pouuoit resister aux Catholiques, lesquelz
 & par escrits refutoient tellement leurs
 erreurs, qu'ilz ne scauoient que respondre
 & en disputes priuees , & publiques , les
 repoussioient en telle sorte , que tous les
 subterfuges qu'ilz cherchoient , ne leur
 seruoient de rien : ainsi qu'ilz auoient tas-
 ché à attirer le peuple à eux par vne li-
 berté charnelle, faulxement appellée Euā-
 gelique, ensuyuant Mahommet. En l'imi-
 tant pareillement se sont efforcez de plan-
 ter en France par armes leur abominable
 secte : & ayans tiré a leur cordelle plu-
 sieurs, desquelz ou pour ieunesse, ou lege-

reté d'esprit, ou pource qu'ils sont si fort
 endebtez, que sans piller le bien d'autrui
 ne se peuuent acquiter, ayans abusé par
 plusieurs fois de la bonté du Roy, n'ont
 eu honte d'entreprendre sur luy, & luy
 faire la guerre, de se saisir de ie ne sçay
 combien de ses villes, voire & des princi-
 pales, detrousser les Thresoriers, & s'ap-
 proprié à eux les finances: & qui est le
 comble de tous maux, ont commis & con-
 spiré la mort des Catholicques, & notam-
 ment des gens d'Eglise, innumerables vo-
 leries, pilleries, & sacrileges. Que di-
 i-e sacrileges? Ilz ont mesme ruyné & abbatu
 les Eglises, & d'une cruauté que Turques-
 que, voire & non iamais ouye, ont par di-
 uers tourmens massacré plusieurs prestres
 en despit du saint sacrifice de Iesus Christ
 qui par eux s'offroit pour l'Eglise pensans
 estre au comble de leus intentions. Ce qui
 se peut veoir de present à l'œil en aucune
 parties de ce Royaume. Ces choses sont el-
 les pas si abominables, & si execrables,
 que tout bon Catholique en a horreur,
 non à les ouir, mais aussi à les penser seu-
 lement. Et que dirons nous si Dieu pour
 noz iniquitez nous regardoit d'un œil si
 mal piteux, qu'il nous fallust veoir de noz
 yeux faire ce qu'en oyant seulement, nous
 ne pouuons faire que le cœur & le corps

ne nous en tremble? Quel miserable spectacle seroit ce (que ie à Dieu ne plaie) si tant de belles Eglises edifiees de si long temps à l'honneur de Dieu, & pour son seruice, estoient en vn moment à l'appetit de gens incensez & possédez du diable, ruinees & demolies? si tant de belles reliques, tant de beaux ornemets, & de beaux vaisseaux d'Eglise que nous ont laisse nos predecesseurs consacrez & dediez à Dieu, tant de beaux Monasteres de Religieux, & Religieuses, vn si bel Hospital fondé & erigé pour le nourrissement des pauures de si beaux Colleges erigez pour l'instruction de la ieunesse, en toute bonne doctrine & en la religion Chrestienne & bonnes mœurs? Quel spectacle, dy ie seroit-ce, si tant de beaux edifices dediez à l'honneur de Dieu & deputez au bien public estoient donnez en proye à larons, voleurs, brigas & sacrileges? Et penserions nous estre de meilleure condition que les autres? Ce qu'ils ont fait en vne infinité de villes qu'ilz ont prinsez, y a il en France personne qui ne le sçache? Mais que parle ie de ces villes qui sont si eslongnees de Paris, que on en pouroit auoir quelque cause d'ignorance? Et ce qu'ilz ont rencôtrez, faisans leur deuoir outre le bruit cōmun qui en est & qu'vn chacun sçait, qu'ilz en ont les vns eschorchez, les autres crucifiez, les autres

costiz, & mis à mort le plus cruellement du monde, nous tesmoignent assez la fuite de tant de gens d'Eglise puis s'en sont venuz au refuge en ceste ville. Or estant les choses telles & si notoires, y a-il pas iuste cause de les mettre au reng des plus meschans qui furent iamais au monde & en ayans vn cœur deuotieux & remply de pieté Chrestienne, se disposer à se à vouloir vaillamment soustenir l'honneur de Dieu, & la iuste querelle de s^{on} Eglise, qui par euz est tellement outragée? Et qui en doute: Mais que fait le malheureux Sathan, qui au cōmencemēt dōnoit à entendre par l'organe de ses ministres, qui faisoient la chatemite, & iouoient le personnage d'hypocrites, qu'ilz ne demandoient qu'amour & simplese, abhorroient toute sedition, tout tumulte, & toute guerre? Les ayant maintenant faict faire tout le contraire de ce qu'ilz disoiēt, & qui estoit directement contre leur pensēe, vne guerre ciuille estant esleuee en France telle que on ne vist, ne ouyst on iamais la pareille, voies vn peu par qu'elle ruse il tache à tout ruiner. Estant lordre sacerdotal par son pourchas & à sa poursuite, de long temps enuers quelques vns en non pas trop bōne estime, il poulse de plus en plus fort à la

rouë, & tache de pl^e en plus à les rédre odieux, & de les mettre en la male grace du peuple. Et de fait maintenāt que par instigatiō ils ont esté si mal traictez, que les infidelles mesmes, s'ilz le sçauoient, en auroient pitié, il fait semer par ses seditieux rebelles, voleurs & pilleurs d'Eglises, que la cause de ceste guerre, viēt des gēs d'Eglise & qu'il ne faut point que le cōmun peuple craigne: car ilz n'en veulēt qu'aux ministres de l'Eglise. Et pourquoy font ilz cela? A celle fin qu'en n'effarouchant, & n'irritant point le peuple, auquel ilz disent qu'ilz ne demandent rien, il ne se face point d'amaz de gens contre eux, qui leur face resistāce, & que ayās pillé & vollé les Eglises, & s'estans saisis des dismes, (qui de droict diuin appartiennent aux ministres de Dieu) ils puissent trouuer à qui les vendre: & qu'à lors toutes les Eglises estans pillées, ils pourrōt bien aisement venir à bout du simple peuple, qui ne se mettera point en defence. pour ce qu'il ne se doutera de rien.

Telles sont les ruses de Satan, pere de mensonge, qui pour mener le mōde à perdition, a tousiours accoustumé de se transformer, & trasfigurer en vn Ange de lumiere. Mais pourtant que ces mal-heureux rebelles à Dieu & à leur Prince, taschent

en leur cruauté plus que tyrannique, courir leur meschanceté, & faire leur cause bonne, en disant que les Ecclesiastiques sont cause de la guerre, & qu'ils n'en veulent qu'à eux, s'il sera bon de regarder, si en ce qu'ils disent, il y a quelque apparence de verité. Et premierement, quant à ce qu'ils disent qu'ils n'en veulent qu'aux Ecclesiastiques: qui est l'homme du monde si incensé qui puisse croire, ayant veu qu'ils se sont saisis fraudulently de tant de villes du royaume, ont violement rauy & destrouffé les finances du Roy, cōtre lequel ils n'ont point eū de honte de solliciter les nations estranges de descendre en France pour ruiner, s'ils eussent peu, & le Roy, & le pays? A qui sera il credible qu'ils n'en veulent que aux prestres, ayant veu que pour repousser les torts & iniures qu'ils luy font, & pour reconquister les villes qu'ils ont prinſes, le Roy est encores à present contraint d'assembler ses forces, avec lesquelles il fault qu'il se face faire raison de ses subiectz? Le Roy di-ic, qui de toute ancienneté, a esté le plus redoute de ses ennemis, & le mieux obey de ses subiectz, que Prince fust au monde. Voire mais il n'en veulent qu'au Roy, & aux Prestres, à ceux qui portent les armes contre eux,

mais au peuple, il ne font point de des-
 plaisir. Pour monstrier que cela est faux,
 il ne faudroit qu'alleguer les pilleries, ex-
 tortions, oppressions, & violences, qu'ilz
 ont fait aux pauvres Catholiques es villes
 esquelles les ayans prinſes d'emblees &
 ſans qu'on ſ'en donnaſt garde, ils ont eſté
 les maîtres: Mais pource que tout cela ne
 conſiſte qu'en perte & dommage de leurs
 biens, ou en iniures, & outrages de parol-
 les, ou en tourment corporel de non pas
 grand nombre; ſi ce n'a eſté de quelques
 Prestres qu'ilz ont mis à mort, ſelon leur
 couſtume, ie m'en deporterai à preſent, ie di-
 ray ſeulement ce qui ſ'eſt paſſé de freſche
 memoire par tout le Royaume de France,
 afin qu'on voye avec qu'elle ſimplicité
 marchent ces regards. Et ſi c'eſt le zele de
 l'Evangile qui les pouſſe, mais pluſtoſt un
 deſir ſanglant de tout ruyner, & du regne
 de Jeſus Chriſt baſtir le ſiege de Sathan,
 & ruyner tout le monde, & du venin in-
 faiſt de la prostitution de la paillarderie he-
 reſie, avec laquelle ilz ſe ſont vnies inſepa-
 rablement. Car de penſer (le trouver mau-
 vais qui voudra) qu'un huguenot ferme
 qui avec Iudas a faiſt la Cene, & a cōſpiré
 contre Dieu, & contre les Magistratz, tāt
 ſpirituelz que temporelz, ſoit iamais bien
 affectionné ny à l'Egliſe fidelle & Catho-

licque, ny au Roy Tres-Chrestien, c'est se tromper plus que de moitié: d'autant que le diable s'est saisi de luy, & que l'enuie du serpent ancien ne mourra iamais tant que il verra l'homme en quelque chemin d'innocence. Vous avez donc veu que cessant vu peu les persecutions, avec, & par lesquelles ilz affligoient les Ecclesiastiques comme caufateurs (ainsi qu'ilz le chantét) de tous les malheurs de ce Royaume: voyant que ce chemin estoit trop espineux, & que la mort des gēs de biē Ecclesiastiques estoit l'auancemēt de la gloire de Dieu ilz ont quitté aussi le glaive de ce costé, esperant qu'apres auoir abbatu le chef public ilz auroient bon marché du reste, & que le Roy ruyné, les Ecclesiasticqs ne pourroient subsister. Qu'ont ilz fait les vns cōme les plus conscientieux se sont retirez hors du Royaume, Tous ces genres d'hōmes ont payé le Roy d'une estrāge monnoye, conspirās sa mort, & le reuersemēt de tout l'estat du Royaume, & par cōsequent l'abolissement de la religion Catholique, & en fin la mort pitoiable des Ecclesiastiques & de tout le peuple affectionné à l'Eglise Romaine. Les premiers comme ennemis descouuers se sont mis en campagne & ont fait tout ravage à eux possible sur les susdictz Catholiques du Roy & de ceuxcy

a esté cōducteur Mont-gonmery, chef de
 lascheté & le subiect de toute villennie,
 lequel à couru avec les bannis de ce Roy-
 aume, & quelques barbares tecuillis de
 diuers lieux, les haures de France, saccage
 le plat pays, persecuté les Ecclesiastiques,
 ou il les à peu empoigner. Et plus il a vo-
 my son venin & monstté sa rage, lors que
 son frere sur-nommé de Sainct Iean (mais
 n'ayant rien propre à tel nom) fut occis
 faisant leuee d'hommes contre la Majesté
 de son Prince: car lors Mont-gommery,
 s'est desrobé & a fait des insolences plus-
 que brutalles à la Normandie, osant tou-
 tesfois publier, que pour deliurer le peu-
 ple de seruitude il tenoit la campagne:
 comme s'il estoit croyable que le loup en-
 tre dedans le parc pour la conseruation de
 la bergerie. Les seconds qui soubz le voile
 d'ouyr vne Messe, & porter des chapeletz
 comme passe-portz, & assurance ont aus-
 si esté ceux qui tenoient la main aux pre-
 miers, & estans parmy nous ont descou-
 uert & fait les menaces, pratiqué les grâds
 & donné les ouuertures pour ruyner ce
 qui leur faisoit resistancce: & desquelz vous
 voyez les conseilz esclarcis ainsi que quel-
 que iour (Dieu aidant) puisse vous le faire
 cognoistre. Quant aux troisieme, comme
 leur pariture est detestable aussi sont ilz

abominables : car ayant eu ceste grace du Roy, que d'eschapper la mort, tant de fois par eux meritee, N'ont pourtant laissé de se reuolter, & faisant amas illicites se mettre en campagne & se saisir des places, & villes de de ce Royaume.

De telz a este chef en poictou vn nommé la Noné, endurcy en ses trahysons, & le plus desloyal qui viue, car tel le peult on dire, puis que si souuent il a faulce sa foy & l'est mōsté ingrat au Roy, qui par trois fois luy a saute la vie: Si ce conspirateur a este gracieux aux Ecclesiastiques ie m'en rapporte à ceux qui ont esté prisonniers à la Rochelle, & en autres villes de Poictou; & qui se sont sauuez par leur industrie: tant y a que ie suis assuré qu'vsant de quelque courtoisie ce n'est pour autre raison que pour tromper le peuple & luy faire acroire que non la religion, ains quelques autre consideration leur a fait prendre les armes. Car si Dieu eust permis leur dessin venir à la fin qu'ils pretendoient, les pauvre Ecclesiastiques, pouuoient se tenir: prest pour rendre compte de leurs vies, deuant ces Capitaine Caluinistes: L'autre chef est Mombrun en Dauphiné, le premier qui de nostre réps a porté les armes, & fit menees cōtre son Prince: S'il est courtois ie m'en rapporte à tant de gens d'Eglise

glise fugitifs de leur pays aux riuieres qui
ont receu les corps des massacrez, & aux
Eglises piliees. Et ne veux vous dire, que
l'annee passée les brigans Huguenots de
Languedoc feirent à Lodesue, qu'ils prin-
drent, ne sçay si c'est par trahison ou par
conniuece, & là ils trouuerent le corps
sainct d'un Euesque aussi entier que le pro-
pre iour qu'ils auoit esté enterre: ils s'a-
charnent sur iceluy (mort y a plus de qua-
tre cens ans) & le deschiquèterent à grans
coups d'espee. O faict barbaresque! mais
ô grand iugemēt de Dieu! Ce corps sainct
seignant comme s'il ne faisoit que uenir
d'estre occis, & neantmoins ces brigans ne
s'effroient d'un si supernaturel & prodigi-
eux miracle ains l'em poignant le iectent
au feu, lequel resista aux flammes, & ne
peut onc estre brulé, & pour ce ils le me-
irent en cent mille pieces, & les iecterent
& espendirent on ne sçait où, afin que les
fidelles Chrestiens ne recueillissent ses
sainctes & dignes reliques. Y eust il ia-
mais homme qui ait ou leu aux histoires,
ou seulement ouy reciter vn faict si horri-
ble & si detestable. Ce n'est encore tout:
car les agents de ce tyran Monbrum, avārs
fait long temps bonne pipee, & se feignāts
bons Catholiques ilz ont faict amas, se
sont renforcez en leurs maisons & prest-

que tous aux despens du Roy. Et se met-
tans en campagne, ils ont faict des raua-
gemens si hideux, que i'ay honte qu'on fa-
che entre les estrangers que les François
vsent d'inhumanité si barbare que le Turc
ne voudroit auoir pour pense. Car depuis
que Peyrault & Peloux se sont soustraitz
du seruice du Roy (si iamais ilz luy en fei-
rent de bon) on a veu deschirer lez corps
des pauvres Catholiques comme qui de-
couperoit la chair sur l'estau à la bouche-
rie. Et cesont ces diables incarnez, oubliez
iusqu'à là que pour auoir les aneaux des
filles & femmes qu'ils auoient violees, &
puis massacrees, ils leur ont coupé les bras
et les doigts avec vu exemple le plus cruel
& effroiable qu'un homme sçauroit ima-
giner. Je laisse les maisons, villages, &
bourgades bruslez, pour n'auoir le nom
bien au vray quoy que ie cognoisse les Sei-
gneurs à qui a esté faicte l'iniure. Et dis
seulement: Que si Dieu ne leur eust rom-
pu leur dessein, & qu'ilz n'eussent failly à
l'entreprise de Valence, on eut veu recom-
mencer la guerre contre les Ecclesiasti-
ques pire qu'elle n'estoit aux premies trou-
bles: Et puis vous direz que ceste religion
puisse apporter chose que vaille, en quel-
que repos au Royaume où elle aura pris
pied & fait entree: mais la chose la plus

cruelle qui soit este faicte de nostre temps
 ça este que Solymán l'empereur des Turcs
 qui, feist mourir à Budes bien huiet cets
 prisonniers Allemans, qui s'estoient ren-
 dus à quelq'un de les Capitaines à la des-
 confiture de Rocandolfe & de l'armée de
 Ferdinand Archiduc d'Autriche deuant
 Budes en Hongrie. Il ne faut point nier
 que la chose n'ait esté fort cruelle. Il n'y a
 personne qu'il la puisse aucunement excu-
 ser qu'il n'ait vsé d'une grande barbarie.
 Si est ce qu'en Solymán cecy est d'autant
 plus tollerable, que la diuersité de la reli-
 gion. & la cruelle guerre qu'il luy auoient
 faicte, & que ce temps pendant que ferdi-
 nand auoit enuoyé vers luy son Embasa-
 deur pour impetier le Royauine de Hon-
 grie, il auoit quand & quand enuoyé vers
 vne armée pour les prendre. Toutes ces
 choses font que la cruauté ne semble pas
 si grande. Mais que peult cestui-cy aleguer
 pour diminuer l'estime qu'on a à bon
 droict de luy qui a faict la plus grande,
 & excessiue cruauté du monde? Peult il al-
 leguer diuersité de religion? Nenny. Car
 ça esté luy qui les a surpris deuant qu'ils
 s'en duotassent: & ne trouuera on point
 qu'il luy ayent mesfaict en chose quelcon-
 que, Il ne se sent offense de ce qu'on sert
 Dieu. & qu'on faict honneur à la glorieu-

se vierge Marie. Ou si possible les hommes
 luy auoient fait quelque desplaisir en ce
 qu'ils se seroient mis en quelque effort
 cōtre luy: cōbien que la chose soit bien ri-
 goureuse de se venger ainsi de froit sang,
 la cholere estant passée. Neantmoins puis
 qu'il se veult venger, qu'il tue & massa-
 cre ceux qui luy eussent peu nuire, combi-
 en qu'ils ne l'ayent faict. Mais de tuer en-
 semble vieux & ieunes, peres, & meres,
 maris, femmes, fils, & filles, voire iusques
 aux petits enfans estans au berceau, ou
 sucçans encor les mammelles de leurs
 meres, c'est à faire à vn qui estant plus ty-
 rant que Herodes, faict mourir les inno-
 cens en persecutant Iesus Christ. Or n'a il
 pas, comme vous voyez, seulement exerce
 sa cruauté contre les prestres: car nous
 trouuons qu'ils sont ennemis de tous ceux
 qui sont en l'Eglise de Iesus Christ, ce qu'il
 nous fault maintenant monstrier, estans
 venuz à ce point, qu'il nous conuient exa-
 miner ce qu'ils disent: c'est à sçauoir, que
 les prestres sont cause de la guerre. Et pre-
 mierement en c'est endroit ie ne me puis
 assez esmerueiller de leur impudence. Ils
 disent que les prestres sont cause de ceste
 guerre: mais si ainsi est. à quelle raison &
 sous quel tiltre font ils la guerre au Roy
 & entreprennēt sur son estat? Y a il raison

que pourtant qu'il haient les prestres ils prennent les armes & conspirent contre leur Prince, qui ne leur à point donné d'occasion? S'ils ne veulent dire, comme ie suis certain qu'ils disent en leurs cœurs, qu'ils ne scauroient ruiner l'Eglise Catholique, de laquelle les Prestres ordonnez de Iesus Christ sont les ministres, s'ils ne ruinent premierement le Roy, lequel ayant le noble tiltre de Tres-Crestien, & suiuant la trace de tous ses predecesseurs, n'abandonnera iamais la defense & la protection de l'Eglise. La cause doncques de ceste guerre ne vient pas des prestres, comme ils mettent en auant pour vn pretexte, mais de ce qu'ils voudroient que l'Eglise Catholique, c'est à dire la congregation vniuerselle des fideles qui croient en Iesus-Christ, fust totalement abolie. Et cecy est le scope, le but, & le dessein de toute ceste guerre. Or s'ils veulent dire que ie ne dis pas vray, & persistent à dire que les prestres en sont cause, le leur demanderois volontiers pourquoy ils le disent. En sont ils cause, pour ce qu'en privé, ou en public, ils leur ayēt fait quelq' outrage? ils ne le diront pas & ne le scauroiēt dire, en voulant dire la verité. Mais posez ores que ils leur eussent fait quelque chose qui ne fust de faire, falloit il incontinent courir

aux armes? Le Roy veult il pas qu'on face iustice à tout le monde, suiuant que sa charge & son deuoir le porte? Si les Ministres de l'Eglise leur auoient fait quelque tort, les deuoint ils pas tirer en cause deuant les iuges, qui leur eussent fait droit & iustice? Ou s'ils craignoient que les iuges ne fussent tels qu'ils deuoient, c'eust esté le plus expedient de demander iustice au Roy mesme, & a son conseil. Mais de faire la guerre aux prestres qui sont point armez, sans leur faire entendre ce qu'on leur demande, voire & au Roy mesmes qui n'en peult mais, & ne sçait rien de leur different, y a il homme de bon iugement au monde qui le puisse trouuer bon? Les prestres donques ne leur ont fait ne tort ne desplaisir en façon quelconque: & s'ils eussent ils en eussent eu reparation par iustice, sans venir à voie de fait, de sorte que il n'eust esté ia de besoing de venir aux armes. Mais regardons s'il y a point quelque autre chose qui les meine. Si-a, disent ils, car il est impossible d'endurer la mauuaise vie des prestres, qui sont paillars, ribaux concubinaires, & plains de beaucoup de vices, & les autres sont si ignoras, qu'à grãd peine sçauent ils lire. Que diray-je icy? Nieray-je qu'il soit ainsi? pleust à Dieu que tous les prestres & ministres de l'Eglise se

fussent tousiours deportez en sorte, qu'il n'y eust personne, qui leur peust rien obiecter. Mais quel merueille est-ce si en si grand nombre, il y en a quelques vns esquelz on trouue à redire? Y a il aujourd'huy estat au monde, soit de gens de iustice de Gentils hommes, de marchans, d'artisans, de laboureux, & de tous autres generally, qui facent tellemēt leur deuoir qu'en eux on ne trouue que reprendre? Cecy oseray-je bien dire asseurement, que si en l'estat Ecclesiastique il y a de mal-vi-uans, il y en a aussi de ceux qui meinent vne vie exemplaire de vertu. Et s'il y a des prestres qui soient ignorans, il y en a aussi plusieurs d'un eminent sçauoir, & qui font si bien leur deuoir, que les enuieux mesmes ne sçauoient comment y mordre & la grace à Dieu ne s'en trouuera pas trop grand nōbre de ceux desquels la vie scandaleuse. Ce que ie puis dire de plusieurs endroiets de ce Royaume, mais principalement de vostre Cité de Paris, en laquelle y a si grand nombre de Docteurs de Religieux & autres y commis par l'Euesque vostre Pasteur & prelat, lesquels avec leur bonne vie & suffisante litterature, vous peuent donner exemple de bien viure, & vous repaistre de bonne & saine doctrine. Et pour ce mieux faire, & affin

que vous n'en eussiez faite, les Roys vous ont fait edifier de fort beaux Colleges, & font que vostre Cité soit Vniuersité de presque tous les Chrestiens, au moins la premiere & pl^e fameuse du monde Mais posons le cas que la vie de plusieurs donnast scandale & que tout le Clergé fust cōfit en extreme ignorāce y a il raison pourtāt qu'on tourmente cruellement, & qu'on tue & massacre les prestres, & qu'on face la guerre au Roy? Est-ce le moyen de reformer l'Eglise que par armes? La reformation se doit elle faire par pistoles, faucōs, & bombardes, & non pas par les Canons des Conciles! Or affin qu'on sache que pour cela il n'yauoit, ie dis pas cause, mais seulement occasion de faire la guerre: Je vous assure bien qu'a poissy estans dernièrement congregez tous les Euesques de ce Royaume fut conclu & arrestee vne telle forme & maniere de reformation, qu'elle estant vne fois bien establie & mise en executiō comme elle seroit bien tost (Dieu aydant) si ces alarmes cessoient, il seroit bien malheureux qui voudroit seulement murmurer contre les prestres, & a esté ce qu'ils ont fait, comme vn preambule & vne preparation de ce qui se pourroit fort bien resoudre au Concile general: lequel estant il y a long temps de rechef ouuert à Tren-

te, où il auoit esté commencé, quelle rage est-ce quelle frenaisie d'esmouuoir vne si cruelle guerre sous couleur & pretexte de reformation, veu que ceux là maintenant sont apres pour la faire à qui la charge en appartient, mais ie m'apperçoy de ce qu'ils veulent dire. Nous ne voulons point disent ils, de leur reformation: car nous en voulons faire vne toute nouuelle, qui n'a rien de commun avec la leur. Et comment celà ils sont apres, disent ils, pour donner ordre que les prestres & ministres de l'Eglise facent leur deuoir: mais nous, nous les voulons du tout abolir, Et à ceste cause nous faisons ceste guerre, affin qu'ayans tué & massacré tous les prestres il ny en ayt plus.

Voila donc le but & le dessein ou ils tendent & la cause finalle pour laquelle ils ont entrepris ceste guerre, cest assavoir pour chasser le Roy de son Royaume, & de tuer tous les prestres. Mais pourquoy est-ce, dira quel'un, qu'ils hayent ainsi les prestres? pour ce que le diable les a incitez à ce faire, affin que n'y ayant plus de prestres. & ne se faisant plus le sacrifice de Iesus Christ, la foy Catholique soit totalement abolie avecques l'Eglise. Car assurez vous, que si on n'a ceste ferme foy qu'en l'Eucharistie est reallement & de

faiēt le precieux corps & sang de Iesus
 Christ, qui s'offre à Dieu par l'Eglise, le
 prestre en estant le ministre pour les pe-
 chez des viuantz & des trespassez, on peut
 bien dire qu'on est hors de la nef de l'E-
 glise Catholique, & qu'on ne peult estre
 sauué. Cela se prouue aisement par l'es-
 criture & par les paroles de Iesus Christ
 mesmes & l'vniuersel consentement de
 l'Eglise tant en Orient qu'en Occident, &
 l'ysaige qui est encores par tout & a esté
 depuis le temps des Apostres, par tout,
 dis-ie, où est, & a esté la foy de Iesus christ
 Et neantmoins se nostre temps leuez des
 Apostats, qui avec leur esprit Satanique
 ayant persuadé le contraire à plusieurs de
 ce Royaume, leur ont faiēt prendre les ar-
 mes contre leur Prince & contre l'Eglise,
 L'Eglise dis-ie tant militante que triom-
 phante, & tant des viuans que des trespassez.
 Qu'ilz ne demeurent, si contre
 ce qui est en l'Ecriture & contre la tradi-
 tion des Apostres ne veulent point qu'on
 honore & prie les saincts, & mesmement
 la benoiste Vierge Marie mere de Dieu,
 ne qu'on prie pour les trespassez. Mais
 qu'ay-je diēt qu'ilz font la guerre à l'E-
 glise? Ilz font bien plus fort: car ilz la
 font à Dieu mesme & à nostre sauueur Ie-
 sus Christ. Dieu a il pas diēt que depuis

le Soleil leuant iusques en Occident son nom est grand entre les nations, & on me sacrifie & offre vne oblation pure & monde, qui ne se peut entendre sinon de l'Eucharistie. Mais ceux-cy qui disent au contraire, qu'il aura menty, & qu'il ne s'en fera rien: & qu'en despit de luy, ilz abolirent totalement le sacrifice en tuant tous les Prestres. A il pas dict pareillement parlant à Iesus Christ. Tu es le Prestre eternellement selon l'ordre de Melchisedech.

Comment se peut verifier cela, si ce n'est que par la toute puissante parolle de Iesus Christ proferee par la bouche du Prestre le pain transmue en son precieux corps, & le vin en son sang s'offre à Dieu par toute l'Eglise, le Prestre en estant le Ministre? Mais que font ceux-cy? Ilz disent tout contraire, qu'ilz l'engarderont bien d'estre le Prestre selon l'ordre de Melchisedech. Car ilz ne permettront pas qu'il se face aucun seruice soubz les especes de pain & de vin. Est-ce pas impudemment dementir Dieu & resister totalement à son vouloir & à sa puissance? En font il pas autant à Iesus-Christ quand ilz disent qu'il n'est pas vray, que par sa parole soit en l'Eucharistie son precieux corps & sang, & quoy qu'il ait commandé à ses A-


postres, qu'ilz feissent ce qu'il auoit fait
 c'est à sçauoir qu'ilz offrissent à Dieu son
 corps & son sang en memoire de luy, que
 ilz l'engarderont bien que ceste oblation
 n'ait lieu: car ilz tueront tous les Prestres,
 & par ainsi cessera ce sacrifice. Sont-ce
 pas icy parolles abominables & execra-
 bles? Mais ne pensez pas qu'ilz le disent
 seulement, mais ilz font d'auantage tout
 leur effort pour l'executer, & où? Au
 Royaume de France, qui a tousiours esté
 le Royaume le plus Chrestien du monde
 & mesmes au pays dont la foy Chrestien-
 ne s'est respandue parmy les François.


Ne permettez pas Seigneur Dieu, ne
 permettez pas qu'à vostre peuple Tres-
 chrestien il aduienne vne si grande cala-
 mité, que d'estre priué de vostre eternal
 sacrifice, que vostre filz vnique a ordonné
 estre offert pour les pechez. Vous n'avez,
 pas Seigneur Dieu faite d'autres verges
 pour nous chastier. Vostre velonté soit
 faite en la terre comme aux cieux, seu-
 lement donnez nous la grace que nous ne
 varions iamais de vostre sainte foy, &
 que si le temps est venu, ou à tout le moins
 s'approche de la venue de l'Antechrist,
 auquel Daniel vostre Prophete a prophe-
 tisé, que pour vn temps cesseroit vostre
 eternal sacrifice, que sela n'aduienne point


en nostre endroict. O bon, voire souuerainement bon Iesus, vous nous auez rachetez de vostre precieux sang au sanglant sacrifice, quand vous vous offristes vous mesmes vne fois à Dieu vostre pere en la croix, mais il ne nous est pas appliqué sinon par ce non sanglant sacrifice que vous nous auez ordonné & institué. N'endurez pas que les Apostatz enuoyez du diable & qui vous ont renoncé, puissent tant faire en ce Royaume tres-chrestien, que le sacrifice, qui est l'honneur qui appartient seulement à Dieu vostre pere luy estant osté, nous n'aurions pas remission de noz pechez & ne serions pas voz coheritiers de la vie éternelle selon vostre promesse. Que le diable qui à despit qu'on ne luy sacrifie plus nulle part, ne se glorifie pas que ce saint sacrifice qui a tousiours esté célébré en la Gaule depuis que la foy y a esté plantée par Sainct Denis, vostre Apostre soit totalement aboly & annichillé. Nous vous en supplions à ioinctes mains Seigneur Dieu, nous vous en supplions non pas en contemplation de noz merites: car nous recognoissons miserables pecheurs: mais en contemplation de vostre saint nom, qui a autant esté loué, sanctifié & glorifié en ce Royaume, qu'en autre qui soit au monde. Si nous faisons ainsi noz

prieres, ô Chrestien & vray Catholique
 peuple de Paris en luy demandât de cœur
 contrit secours & aide en nostre necessité,
 & en nous delibérant moyennant sa gra-
 ce de vaillamment & hardiment resister
 à ces pilleurs & volleurs d'Eglises, qui
 sont ennemis non pas seulement des Pre-
 stres, comme ilz disent, mais & du Roy,
 contre lequel ilz se sont rebellez, & de
 toute la congregation des fidentes en Iesus
 Christ qui est l'Eglise, de la benoiste vier-
 ge Marie mere de Dieu, & de tous les
 saincts & saintes: voire & de Iesus Christ
 mesmes, & de Dieu son Pere, nous deuons
 auoir vne ferme esperance, que ces mal-
 heureux sacrileges auront de bref la pu-
 nition telle, que leur desloyauté &
 impieté & leur abominable & de-
 testable cruauté le
 requiert.

F I N.









40



THE
NEWBERRY
LIBRARY

